

Dumonda Rutishauser concernent l'engaschament da persunas che tgiran lur confamigliars

Persunas che tgiran lur confamigliars prestan ina gronda contribuziun indispensabla a favur dal provediment da sanadad. Quai sco completaziun da la tgira professiunala che vegn furnida en l'ambient chasan cunzunt tras la Spitex e tras tgirunzas e tgirunzs che lavuran independentamain. Organisaziuns da Spitex pon engaschar persunas che tgiran lur confamigliars per che las prestaziuns che quellas furneschan possian vegnir indemnissadas sur l'assicuranza obligatorica da malsauns.

Tenor in rapport dal Cussegl federal dals 15 d'october 2025 sa sviluppan dentant – pertutgant l'engaschament da persunas che tgiran lur confamigliars – pli e pli models da fatschenta, nua che purschiders privats genereschan entradas considerablas, senza ch'i resulta ina plivalur correspundenta per las persunas che dovran tgira u per lur confamigliars.

Quests models sa basan per part sin il fatg, che persunas che tgiran lur confamigliars vegnan engaschadas a pajas fitg bassas, entant che las organisaziuns cumpenseschan las prestaziuns a quint da l'assicuranza obligatorica per la tgira da malsauns u a quint dal maun public. Uschia resulta in model da fatschenta che serva en emprima lingia a maximar il gudogn, quai sin donn e cust da las persunas che tgiran lur confamigliars e sin donn e cust dal maun public.

Sut quest aspect supplitgeschan las sutsegnadras ed ils sutsegnaders la Regenza da responder las suandantas dumondas:

1. Co valitescha la Regenza la situaziun actuala en il chantun areguard tals models da fatschenta che fan gudogns sin donn e cust da las persunas che tgiran lur confamigliars sco er dal maun public?
2. Davart tge meds legals u davart tge meds dal dretg da surveglianza dispona il chantun per agir cunter models da fatschenta ch'èn da valitar sco abusivs u inadequats?
3. Ha la Regenza, sin basa da las enconuschientschas dal rapport dal Cussegl federal, l'intenziun d'examinar mesiras per prevegnir u per franar tals svilups?
4. Co pon ins procurar che la qualitat e la rentabilitad da las prestaziuns furnidas da confamigliars èn garantidas?

Cuira, ils 10 da december 2025